

## **STENOGRAM**

**12. Hitne sjednice Skupštine Kantona Sarajevo  
održane u ponedjeljak, 30.11.2020. godine,  
sa početkom rada u 10,00 sati**

Predsjedavajući Mirza Čelik (daljnjem tekstu predsjedavajući):

Dobro jutro. Evo sada ćemo krenuti čim bude TVSA spremna. Ja vas molim za trenutak samo strpljenja. Hvala. Ja bih vas lijepo molio samo da u viber grupi na anketi prijavite prisustvo kako bi mogli imati 18 zastupnika i da krenemo sa sjednicom.

Otvaram 12. Hitnu sjednicu Skupštine Kantona Sarajevo.

Pozdravljam uvažene kolegice i kolege zastupnike, članove Vlade, sve one koji prate rad današnje sjednice.

Svima nama želim uspješan rad i ugodnu radnu atmosferu.

Prema evidenciji Službe, **ONLINE** sjednici prisustvuje 33 zastupnika, što je dovoljan broj za punovažan rad i odlučivanje.

Izostanak sa ove sjednice nije niko opravdao.

U skladu sa članom 71. Poslovnika konačnu odluku o utvrđivanju hitnog karaktera sjednice Skupštine donosi Kolegij Skupštine.

Kolegij Skupštine Kantona Sarajevo je na sjednici održanoj 23.11.2020. godine utvrdio da postoji osnov za sazivanje Hitne sjednice Skupštine Kantona Sarajevo i odredio termin održavanja iste za dan 30.11.2020. godine u 10,00 sati.

U skladu sa članom 65. Poslovnika Skupštine Kantona Sarajevo, dnevni red za ovu sjednicu utvrdit ćemo danas.

Prije prelaska na utvrđivanje Dnevnog reda imam obavezu upoznati vas da je na osnovu Odluke Centralne izborne komisije BiH, broj: 06-1-07-1-1131/20 od 23.11.2020.godine Harisu Zahiragiću, sljedećem kvalificiranom kandidatu sa liste političkog subjekta Stranke demokratske akcije za Skupštinu Kantona Sarajevo, dodijeljen mandat poslanika/zastupnika u Skupštini Kantona Sarajevo.

Napominjem da je dosadašnja poslanica/zastupnica Samra Ćosović-Hajdarević podnijela ostavku na svoj mandat, te stoga je njeno mjesto popunjeno sljedećim kandidatom sa liste Stranke demokratske akcije.

Pozivam uvaženog gospodina Harisa Zahiragića da položi Svečanu izjavu.

(predsjedavajući i zastupnik Zahiragić su izašli ispred sale 100 kako bi zastupnik položio Svečanu izjavu)

Poslanik Elmedin Konaković:

Predsjedavajući imam poslovničku intervenciju, možete li me uključiti molim vas? Sekretarko, može li neko intervenisati, imamo jedan problem, želio bih da ukažem na potencijalnu nepravilnost.

Predsjedavajući:

Evo samo da provjerimo da li je TVSA spremna za nastavak? Konakoviću vi ste imali intervenciju poslovničku, dat ćemo vam odmah čim TVSA bude spremna za prijenos. Imali smo poslovničku intervenciju, Konaković izvolite.

Poslanik/zastupnik Elmedin Konaković:

Zahvaljujem prevladavajući. Srdačan pozdrav svima vama koji učestvujete u radu skupštine kao i onima koji nas pored malih ekrana gledaju. Samo da provjerimo tu poslovničku proceduru, da nešto ne pogriješimo prilikom preuzimanja mandata. Praksa je bila da se na sjednicama kod utvrđenog dnevnog reda dodjeljuje mandat, samo eto tehničko je pitanje, sekretarko možda vi da nam pojasnite, da kolega Zahiragić ne starta u nekoj nepravilnoj proceduri. Njemu želio sretan rad u skupštini a vas molim da pojasnite ovu proceduru. Trebamo li prvo usvojiti dnevni red kao i jednu od tačaka zakletvu kolege Zahiragića ili vi cijenite da je dovoljno da on ovako nasuho položi zakletvu. Hvala.

Sekretar Aida Zeković:

Dobar dan svima. Vezano za vaše pitanje ja sam pregledala zaista dosadašnju praksu, sve stenograme kako je to do sada išlo, uvijek je prije utvrđivanja samog dnevnog reda data mogućnost da novi zastupnik položi zakletvu. Eto to možemo dakle kroz provjeriti kroz stenograme, ja vam mogu poslati ranije kako je vođena procedura. Nije nikada išlo kao tačka dnevnog reda. Hvala.

Predsjedavajući.

Nadam se da ste zadovoljni odgovorom uvaženi Konakoviću.

Prelazimo na utvrđivanje Dnevnog reda današnje sjednice skupštine kantona Sarajevo.

Premijer je također tražio riječ za dopunu dnevnog reda. Dok čekamo da se neko Javi da predloži dnevni red, ja pozivam premijera ako je spreman da se javi. Premijeru, da li se čujemo?

Premijer Mario Nenadić:

Poštovani predsjedavajući, gospodo dopredsjedavajući, uvaženi zastupnici, pozdravljam vas, dobro jutro svima. Ja sam imao jedan prijedlog za dopunu dnevnog reda, međutim u međuvremenu Vlada je odustala od tog prijedloga, tako da zahvaljujem se na prilici. Mi smo odustali od te tačke, hvala.

Predsjedavajući:

Zahvaljujem. Zahiragić je položio Svečanu izjavu i zakletvu tako da možemo nastaviti sa radom. TVSA je prenosila direktno polaganje zakletve. Znači da li neko želi predložiti dnevni red za današnju Hitu sjednicu Skupštine Kantona Sarajevo? Prijava, Konaković. Konakoviću izvolite.

Poslanik Elmedin Konaković:

Hvala predsjedavajući. Dakle predlažem da današnji red ide ovom hronologijom, ovom logikom:

1. Prihvatanje ostavke premijera Marija Nenadića,
2. predlažemo izmjena i dopuna izbor članova Komisije za izbor i imenovanja
3. Potvrđivanje člana rukovodstva iz reda bošnjačkog naroda a kako bi nakon toga bez da mi čekamo na ovoj sjednici rukovodstvo moglo sjesti, izabrati novog predsjedavajućeg i o tome izvijestiti Skupštinu.

Tim redom, ostavka Nenadića, Komisija izbor i imenovanja, i rukovodstvo Okerić iz reda Bošnjaka.

Predsjedavajući:

Ako se slažete ja sam to zapisao pa evo ovako mogu i pročitati radi stenograma a vi potvrdite ako bude tako pa ćemo proslijediti svim zastupnicima prijedlog dnevnog reda 12. Hitne sjednice Skupštine Kantona Sarajevo:

1. Prihvatanje ostavke premijera Vlade KS,
2. Prijedlog odluke o izmjeni Odluke o imenovanju Komisije za izbor i imenovanja i administrativna pitanja Skupštine Kantona Sarajevo
3. Prijedlog Odluke o izmjeni Odluke o potvrđivanju kandidata za izbor predsjedavajućeg ili zamjenika predsjedavajućeg Skupštine Kantona Sarajevo.

Ako je to taj dnevni red molim da potvrdite kako bi mogli proslijediti svim zastupnicima i anketu napraviti za glasanje o Prijedlogu dnevnog reda.

Poslanik Elmedin Konaković:

Jeste, hvala vam puno predsjedavajući, to je dnevni red. Hvala vam.

Predsjedavajući:

Evo molim ću sekretara da napravi anketu za Prijedlog dnevnog reda, a materijale ćemo odnosno proslijediti, samo je jedna odluka koju trebamo da prosljedimo, a to je o imenovanju Komisije za izbor i imenovanja i administrativna pitanja Skupštine KS. A ostale tačke imate već kroz rad Skupštine.

Otvaram glasanje. Molim zastupnike da glasaju. Zaključujem glasanje.

**ZA JE GLASALO 34 ZASTUPNIKA, PROTIV I SUZDRŽANIH NIJE BILO .**

**KONSTATUJEM DA SMO UTVRDILI PRIJEDLOG DNEVNOG REDA ZA 12. HITNU SJEDNICU SKUPŠTINE KANTONA SARAJEVO.**

Prelazimo na realizaciju tačke jedan.

**AD – 1.**

### **PRIHVATANJE OSTAVKE PREMIJERA VLADE KS**

Premijeru da li imate potrebe za uvodnim napomenama, pretpostavljam da imate. Premijer Nenadić. Izvolite, imate riječ.

Premijer Mario Nenadić:

Hvala gospodine predsjedavajući još jednom. U ime Vlade i u svoje lično ime pozdravljam sve zastupnike u Skupštini Kantona Sarajevo. Evo bilo bi neozbiljno da ne ponovimo ove dvije tri rečenice vezano za ostavku. Evo bilo bi neozbiljno da ne ponovim ove dvije ili tri rečenice vezano za ostavku koju sam podnio svojim aktom 02-01-30-46237/20 od 18.11.2020.godine. Prije svega želio bih reći da sam postupa u skladu sa članom 12. Zakona o Vladi. Odredbama koje mi daju mogućnost da podnesem ostavku predsjedavajućem Skupštine. Ostavku potvrđuje Skupština Kantona Sarajevo, što evo vjerujem upravo se i dešava. Razlozi za moju ostavku leže u činjenici da još 09.10.2020.godine 18 zastupnika u Skupštini Kantona podnijelo prijedlog za glasanje o nepovjerenju Vladi Kantona uz obrazloženje pored ostalog da je Vlada Kantona izgubila povjerenje skupštinske većine jer prijedlozi i odluke nisu mogle biti usvojene zbog izostanka podrške i promijenjene većine u kantonalnoj Skupštini. Reći ću da smo već duže

vrijeme od trenutka podnošenja Prijedloga za glasanje o nepovjerenju Vlade od strane nove skupštinske većine da smo radili u izuzetno teškim uslovima bez neophodne skupštinske većine za izglasavanje i rješavanje pitanja koja su od važnosti za život građana Kantona Sarajevo. Jasno je da Vlada Kantona kao i svaka druga mora imati političku podršku i prohodnost u donošenju hitnih odluka i ubrzavanju pokrenutih procesa što u zadnje vrijeme, posebno se u radu osjetilo, ova Vlada nije imala. Sve navedeno, bio je razlog što sam ostavku najavljavao i ranije. U ovom trenutku ključni razlog je podnošenja ostavke upravo ubrzavanje pokrenutih procesa kao što je ovih dana u javnosti više bilo i riječi. Ja ne bih danas govorio o Izvještaju Vlade Kantona vezano za prijedlog za izglasavanje nepovjerenja Vladi Kantona Sarajevo obzirom da smo materijal ranije u vezi sa tom procedurom dostavili Skupštini Kantona Sarajevo tako da u ovim svojim izjavama zadržat ću se na ova dva tri razloga koja sam upravo naveo. Izrazio bih zaista duboko poštovanje u ovom trenutku razmatranja ostavke na dužnost premijera Kantona Sarajevo prema Skupštini svim zastupnicima u Skupštini Kantona Sarajevo. Ono što, ukoliko danas dođe do usvajanja ove ostavke, ono što će Vlada uraditi jeste u skladu sa važećim propisima obzirom da se podnošenje moje ostavke smatra da su ostavku podnijeli i svi članovi Vlade Kantona Sarajevo, to ćemo vjerujem završiti tokom dana, kako bi u interesu ubrzavanja procedura koje slijede, što prije došli u situaciju da vi koji ste za to nadležni možete imenovati novog mandataru i članove Vlade kako bi procedura išla što prohodnije i brže. Prema tome evo u ime Vlade Kantona Sarajevo i u svoje lično ime, zahvaljujem se i molim vas da moju ostavku danas usvojite. Hvala vam.

Predsjedavajući:

Zahvaljujem premijeru. Dajem riječ predsjedniku Komisije za izbor i imenovanja i administrativna pitanja Skupštine Kantona Sarajevo, Dević Mahir, da li je spreman?

Poslanik/zastupnik Mahir Dević.

Čujemo li se predsjedavajući? Pa evo kratko, iskoristit ću priliku da pozdravim i poselamim sve kolegice, da čestitam kolegi Zahiragiću koji je ušao u Skupštinu Kantona Sarajevo. Mi smo na sjednici Komisije za izbor i imenovanje razmatrali ostavku premijera Kantona Sarajevo, prihvatili je kao individualni čin putem koga je premijer zatražio da se razriješi ova Vlada Kantona Sarajevo. Tu ostavku smo naravno prosljedili e u dalju proceduru prema Skupštini Kantona Sarajevo i to je ono što bi se u ovom momentu moglo kazati vezano za tu vrstu procedure.

Predsjedavajući:

Zahvaljujem predsjedavajućem Komisije za izbor i imenovanje i administrativna pitanja Dević Mahiru. Da li predstavnici radnih tijela žele riječ? Kolegica Danijela Kristić, dopredsjedavajuća, izvolite, imate riječ. Ispred radnih tijela, jel tako kolegice ili?

Dopredsjedavajuća Danijela Kristić:

Pa nije ispred radnih tijela.

Predsjedavajući:

Evo vi ste se prijavili ranije. Da li ima neko iz radnih tijela, evo molim da sačekate. Evo nemamo nikoga od predstavnika radnih tijela. Otvorili smo pitanja. Kolegica dopredsjedavajuća Kristić izvolite, imate riječ.

Dopredsjedavajuća Danijela Kristić:

Zahvaljujem predsjedavajući. Pozdravljam sve prisutne kao i gledaoce kraj malih ekrana. Želim također da zaželim dobrodošlicu kolegi Zahiragiću. Obzirom da je premijer Nenadić podnio ostavku mi predlažemo da Skupština Kantona Sarajevo usvoji sljedeći prijedlog Odluke: Prijedlog odluke o potvrđivanju razrješenja Vlade Kantona Sarajevo

## I

Razrješava se Vlada Kantona Sarajevo u sastavu:

Mario Nenadić, premijer

1. Mersa Kustura, Ministarstvo pravde i uprave;
2. Faruk Kapidžić, Ministarstvo prostornog uređenja, građenja i zaštite okoliša;
3. Nihada Glamoč, Ministarstvo komunalne privrede i infrastrukture;
4. Adi Kalem, Ministarstvo saobraćaja;
5. Ismir Jusko, Ministarstvo unutrašnjih poslova;
6. Draško Jeličić, Ministarstvo privrede;
7. Jasmin Halebić, Ministarstvo finansija;
8. Rusmir Mesihović, Ministarstvo zdravstva;
9. Anis Krivić, Ministarstvo za obrazovanje, nauku i mlade;
10. Kenan Alikadić, Ministarstvo kulture i sporta;
11. Jasna Agić, Ministarstvo za rad, socijalnu politiku, raseljena lica i izbjeglice;
12. Hajrudin Grabovica, Ministarstvo za boračka pitanja.

## II

Premijer i Vlada u ostavci će obavljati sve poslove iz svoje nadležnosti u skladu sa ustavom i zakonom do dana potvrđivanja Vlade u novom sazivu.

## III

Ova odluka stupa na snagu danom donošenja i objavit će se u „Službenim novinama Kantona Sarajevo“.

Hvala.

Predsjedavajući:

Zahvaljujem uvažena kolegice dopredsjedavajuća Kristić. Ja sam proslijedio u viber grupu ovu odluku. Da li imamo još pitanja. Nemamo. Otvaram raspravu. Ukoliko ima neko da se prijavljuje za raspravu evo sačekat ćemo još. Uvažena zastupnica Amra Kaljić Junuzović, izvolite, imate riječ.

Poslanik/zastupnik Amra Junuzović-Kaljić:

Prije svega srdačan pozdrav rukovodstvu Skupštine, članovima Vlade, našim kolegama zastupnicima i svima koji nas prate naš rad. Obzirom da nema ni rasprave, ni hajde da kažem daljih (nerazumljivo) o ovome čemu danas svjedočimo ja jednostavno samo želim da se prije svega i članovima Vlade, rukovodstvu Skupštine (nerazumljivo) zahvalim na radu o ovom teškom vremenu u kome smo se svi našli i jednostavno da kažem da svi su (nerazumljiv) dobro odgovarali na svoje radne zadatke u ovom teškom vremenu (nerazumljivo) onako u kapacitetima u kojima su raspolagali. Dakle hvala vam lijepo.

*(ton nje bio jasan)*

Predsjedavajući:

Zahvaljujem uvažena zastupnice. Još nam je prijavljena uvažena zastupnica Kerla Bibija. Izvolite, imate riječ.

Poslanik/zastupnik Bibija Kerla:

Dobro jutro svima. Ja se Izvinjavam malo me grlo boli. Ja isto koristim priliku da se zahvalim dosadašnjoj Vladi i ministrima koji su dali sve od sebe da se u ovih proteklih devet mjeseci ipak život u Kantonu Sarajevo odvija onako kako treba. Mario Nenadić je dao sve od sebe da ipak uradi podatak kao premijer i kao Vlada, prije svega uzimao je zadatak i ministra zdravstva, ministra privrede i ja mu najiskrenije čestitam kao i svim kolegama koji su bili u Vladi Kantona Sarajevo. Hvala lijepa.

Predsjedavajući:

Zahvaljujem uvažena zastupnice. Kolega Dević Mahir.

Poslanik/zastupnik Mahir Dević:

Zahvaljujem predsjedavajući. Pa evo neki je red da se kaže nekoliko rečenica da se na neki način oda priznanje premijeru Vlade Kantona Sarajevo i samoj Vladi Kantona Sarajevo koja je došla u jedno vrlo teško vrijeme. Svega nekoliko sedmica prije početka pandemije COVID-19 virusa. Radili su vrijedno, borili su se onoliko koliko su bili u prilici da urade. Ono što je jako važno istaći da je ovo Vlada iza koje nije ostala ni jedna afera. Radila je sa vrlo teškom skupštinskom većinom od samo 18 ruku. Učinili su onoliko koliko su mogli i hvala Bogu Kanton Sarajevo je ipak da kažemo u ovaj jedan težak period pandemije, ostao na nogama, kolokvijalno kazano, nije se desio neki scenario kojeg su imale daleko razvijenije zemlje kao što Italija, Španija itd. U ime Kluba SDA želim stvarno da se zahvalim i premijeru i svim ministrima u Vladi Kantona Sarajevo. Mislim da je ova Vlada pokrenula puno infrastrukturnih projekata, možda se nije dovoljno reklamirala kao prethodna Vlada. Želim im naravno svima puno zdravlja, sreće i uspjeha u njihovim privatnim životima a evo što kažu nova parlamentarna većina očigledno ima ruke da prihvati jednu ovakvu ostavku i da formira novu Vladu Kantona Sarajevo. Zahvaljujem predsjedavajući.

Predsjedavajući:

Zahvaljujem kolega. Marić Zvonko je sljedeći zastupnik koji ima riječ. Kolega Mariću izvolite.

Poslanik/zastupnik Zvonko Marić:

Zahvaljujem predstavljajući. Pozdravljam srdačno sve dame i gospodu, drugarice i drugove, sve koji prate ovu sjednicu. Pa evo bez puno patetisanja sigurno su građani svjedočili velikom požrtvovanju i radu Vlade i sasvim sigurno u ovom teškom trenutku treba odati svojevršno priznanje iz prostog razloga ja mogu da odgovorim u ime Kluba SBB i ministara koji su došli iz ovog ili imenovani iz naših redova, i sasvim sigurno Ministarstvo obrazovanja vi znate koliko je bremenito, bilo problema, i ministar Krivić je puno uradio toga. Zatim znamo rad socijalna politika gospođe Jasna Agić ali sasvim sigurno gospodin Jusko u ovim teškim vremenima baš su to bili resori i Ministarstva koji su bili krcati silnim problemima koje je trebalo rješavati. I sami znate koliko je žrtve podnio premijer Nenadić i u to ime svim iz Vlade čestitam na radu a posebice kažem kao šef Kluba SBB onim ministrima koji su dolazili iz naših redova. Naravno u tehničkom mandatu dok budu radili, vjerujem da će sa puno entuzijazma i istom energijom nastojati da ispunjavaju uvjete do imenovanja nove Vlade. U to ime ja im čestitam i želim svako dobro i uspjeh i lijep pozdrav. Toliko za ovaj put.

Predsjedavajući:

Zahvaljujem kolega. Ukoliko nemamo više prijavljenih, ja zaključujem raspravu. Haris Zahiragić se javio ali evo i kolegica Jasmina Bišćević Tokić. Ja sam zaključio raspravu ali evo radi lakšeg praćenja omogućit ćemo da se jave. Uvažena zastupnice Jasmina Bišćević Tokić a molim zastupnike da se prijave da se ne bi doveli u situaciju da zaključimo pa da se neko prijavljuje za raspravu. Znači ukoliko ima još neko da se prijavi za raspravu molim da se to učini u viber grupi a ja dajem riječ uvaženoj zastupnici Jasmini Bišćević-Tokić. Izvolite.

Poslanik/zastupnik Jasmina Bišćević-Tokić:

Zahvaljujem predsjedavajući. Jel se čujemo? Pozdravljam sve kolege, cijenjene ministre u Vladi i gledaoce kraj malih ekrana. Evo javila sam se poslije kolege Mahira Devića također da čestitam Vladi na čelu sa premijerom Marijom Nenadićem i naravno svim ministrima u Vladi. Također želila bih da pohvalim rad dosadašnjeg ministra Kapidžića koji se stvarno sa aspekta struke radio sve projekte, pogotovo vezano za ventilacione koridore, zatim ministra Adija Kalema koji je vrijedno radio na obnovi tramvajske pruge. I da kažem na zaostalim platama pogotovo vezano za Gras, kao što je već potpisao sporazum u samom Grasu i naravno ministricu Nihadu Glamoč, kao i ministra Halebića. Evo ne bih voljela pojedinačno da nekoga ne zaboravim. međutim ono što trebamo naglasiti da ova Vlada kao što je rekao kolega Dević do sada nije imala nikakvih afera. Radila je marljivo, pogotovo vezano za COVID, iako u situaciji kada nije bilo ministra zdravstva, koji bi vodio kao resorno Ministarstvo sve projekte vezano za pandemiju COVID 19 , međutim svi su uzeli na sebe taj teret, pogotovo dva v.d. ministra. To je bio ministar Draško Jeličić i sadašnja ministrica v.d. Jasna Agić koji su sa svojim Kriznim štabom iznijeli jako dobro posao. Iako evo na prošloj sjednici Skupštine Kantona Sarajevo smo vidjeli naravno da ima tu još dosta i nedostataka na kojima treba poraditi. Međutim, sve projekte koji su radili uz sve uslove COVID-a moramo im čestitati, zato što su iznijeli svoj mandat koji je bio samo osam mjeseci u najboljem svjetlu što se moglo uraditi. Meni je žao da na ovaj način ova Vlada završava jer smatram da je sigurno bolje radila od prethodne Vlade na čelu sa premijerom Edinom Fortom. Ja se još jednom zahvaljujem svim ministrima i želim im na privatnim osnovama uspješan rad.

Predsjedavajući:

Zahvaljujem uvažena kolegice. Kolega Haris Zahiragić. Izvolite imate riječ kolega ako ste spremni.

Poslanik/zastupnik Haris Zahiragić:

Poštovanje. Da li se čujemo? Samo momenat molim vas da se video upali. Prije svega želio bih se zahvaliti kolegama zastupnicima na čestitkama koje su iznijeli i javno i u grupi viber koji nam koristi u komunikaciji. Želim da im poručim da se radujem našoj saradnji i da želim da vjerujem da će se u narednom periodu uspjeti svi zajedno, bez obzira na političke pozicije s kojim nastupamo raditi u interesu svih građana Kantona Sarajevo. Bez ikakvih razlika. S obzirom da je na dnevnom redu tačka ostavka Vlade Kantona Sarajevo ne mogu, a da propustim da kratko se referišem na rad ministara iz Vlada Kantona Sarajevo, koje sam iako nisam bio zastupnik pomno pratio. S obzirom da su sadašnja parlamentarna većina a ranija opozicija radili sve na tome da predstave ovu Vladu kao lošom i nesposobnom ne mogu da ne istaknem činjenicu da je premijer Nenadić vrlo hrabro preuzeo u jednom teškom vremenu ovu Vladu u jednom teškom političkom okruženju, ambijentu koji nije bio baš popularan ni u državi ni u Kantonu Sarajevo, naravno došla je posljedica pandemije korona virusa što je sigurno u mnogome otežalo rad ove Vlade. S obzirom da govorim ispred Kluba SDA imao bih potrebu da posebno istaknem ministre koji su dolazili iz SDA, počevši od gospodina Halebića koji je zaista sjajno kao čarobnjak pronalazi sredstva i prebacivao u ovim teškim uslovima od privrede, preko komunalne infrastrukture, kapitalnih projekata itd. I mislim da će se opozicija s tim složiti jer je gospodin Halebić bio i



ranije ministar i (nerazumljivo) i opozicija su isticali da je on najbolji ministar u historiji i ne znam kako se u godinu dana promijenilo da postane član najgore Vlade u historiji. Evidentno neki imaju kod sebe u svojim rukama vagu pravde i pokušavaju selektivno postupati od perioda do perioda. Gospodin Kapidžić za kojeg iako ranija Vlada i ranija šestorka ili sedmorka, koja god već bila ta većina govorila da on imenuje eksperte. Nakon što je imenovan pravnik sa Travničkim fakultetom uz dužno poštovanje prema tom mom kolegi, kojeg politički jako cijenim, na mjesto ministra za urbanizam je došao ministar Kapidžić koji je jedan od najboljih arhitekata kako u Kantonu Sarajevo, tako i BIH a boga mi u regionu. Radi mnogo poslova po cijelom regionu i po cijelom svijetu, tako da mislim da takvi ljudi se trebaju naći u novoj Vladi. On je došao prijedlog struke kao prijedlog Arhitektonskog fakulteta i mislim da akademska zajednica se treba konsultovati prije svih budućih imenovanja. Da je to dobara praksa koju je ranija parlamentarna većina uvela kada je imenovala gospodina Kapidžića. Želim da vjerujem da će ono što je on krenuo, sa nekim eventualno revidiranim stvarima, jer se naravno ne slažem ni ja sa svim idejama koje je on zastupao. Međutim kada je u pitanju urbičid protiv kojeg se on počeo boriti kada su u pitanju Tibrine zgrade koje su katastrofalne i jedna bruka koja ne služe na čast građanima Kantona Sarajevo i da se takve stvari neće ponavljati. Mislim naravno na one zgrade na Stupu, u tom smislu želim da vjerujem da će i naredni ministar nastaviti gospodina Kapidžića poziciju i da će nastaviti raditi kao što je on radio. Kada je u pitanju kultura i sport, drago mi je da se barem kratko da su sportisti Kantona Sarajevo konačno imali svog ministra, koji je napravio historijske rezultate u oblasti podrške Vlade Kantona Sarajevo sportu, gospodin Alikadić je zaista to radio. Imao je puno napada koji su dolazili iz kulture, međutim ukoliko uđete u strukturu tih napada, vidjet ćete da je najveći dio tih napada dolazio od ljudi koji su na teretu građana Kantona Sarajevo 20 godina, svake godine crpili milione maraka bez da je društvo do njih išta imalo. S tim u vezi čestitam gospodinu Alikadiću na hrabrosti. Čestitam mu na angažmanu da neke stvari konačno nakon deset ili dvadeset godina otvori, da neke promjene napravi. Da transparentnost u pravom smislu te riječi, iako je ranija Vlada govorila da je transparentna pokaže, tako da je gospodin Alikadić zaista pokazao šta znači transparentnost i također želim da vjerujem da će sumnjivi grantovi koji su se dodjeljivali u prethodnoj Vladi ali i nekim drugim prije njih da ne bude da ističem samo ovu raniju Vladu, da će prestati. Da će svaka marka koju građani Kantona Sarajevo daju od svojih socijala, od svojih plata, od svog dječjeg doplatka, od svih iz zdravstva te pare kada Kanton da u kulturu, ta kultura mora vratiti Kantonu Sarajevo nešto. I nadam se da će proces koji je gospodin Alikadić pokrenuo biti nastavljen. Kada je gospodin Kalem ministar saobraćaja u pitanju mislim da rezultati njegovog rada najveći broj kapitalnih projekata, početak I transferzale, evo realizacija sporazuma o rekonstrukciji tramvajske pruge čitave, S-krivine koju ranija Vlada nije imala hrabrosti radi obustave saobraćaj. Evo prošla je obustava. A konačno to ruglo od S-krivine je promijenjeno. Sporazum historijski za Gras koji nadam se ako bude realiziran da će konačno dovesti do toga da građani Kantona Sarajevo kada se voze tramvajem ne osjećaju se poniženim, jer ja kao mlad čovjek koji se često vozio tramvajem tokom svog studija i dan danas se znam voziti tramvajem koji ljeti grije a zimi hladi, osjećam se poniženo. I u tom smislu nadam se da ćete konačno pitanje Grasa na tragu onoga što je gospodin Kalem započeo biti riješeno na interes svih, i građana Kantona Sarajevo i radnika koji rade u KJKP Gras. Kada je u pitanju gospođa Glamoč, ministrica komunalne privrede, ona je konsolidovala javnu privredu, neka JP kojima su kasnile plate, su isplaćene plate. Uvela je, pokušala je napraviti neku reformu u nekom organizacijskom smislu. Ona je u tome prekinuta. Želim da vjerujem da će se ta reforma nastaviti. Gospodin Grabovica kao ministar za boračka pitanja, iako je ranija Vlada tvrdila da je zaposlila svu šehidsku djecu ja ih znam stotine koji su nezaposleni. I treba konačno razbijati te mitove. Gospodin Grabovica je donio Uredbu koja ne rješava stvari međutim zasigurno u nekom dodatnom bodovanju djece poginulih boraca i šehidske djece, drugih kategorija koje su obuhvaćene tom Uredbom, sigurno im daje mogućnost da konačno i 25 godina nakon agresije na

BIH društvo se zahvali djeci tih ljudi radi kojih mi danas u slobodi govorimo. Imamo demokratiju, imamo pluralizam itd. I u koračnici gospođa Mersa Kustura kao jedan od boljih pravnika koje sam ja u životu upoznao iako je bila tiha, iako se nije previše eksponirala javno, za svaki, ona je vjerovatno svojim savjetima i rukovođenju Vlade zajedno sa premijerom Nenadićem koji je također vrhunski pravnik dovela do toga da Vlada Kantona Sarajevo nakon evo mandata koji je kratko trajao nema niti jednu jedinu aferu, niti jednu nezakonitost koja je utvrđena i s tim u vezi zahvaljujem se toj Vladi, zahvaljujem se tim ministrima što zaista nije bilo teško braniti njihovu poziciju posljednjih par mjeseci koliko su imali. Kada su u pitanju zdravlje ova Vlada Kantona Sarajevo je zakazala. Vjerujem da za to krivca možemo naći u nekim političkim prepucavanjima koji su sprečavali imenovanje ministra. Želim da vjerujem da će sramotna situacija koja se dešava sada trenutno dok mi govorimo ljudi stoje na minus par stepeni pred DZ, pod upalama pluća čekaju satima da se jedan obični bris uzme. Nadam se da će se ta situacija konačno što prije bolje prije nego poslije, to smo trebali još jučer uraditi, riješiti i da građani Kantona Sarajevo neće sa nekim lakšim kliničkim slikama nakon što odu u DZ vraćati se kući sa teškim kliničkim slikama. Toliko, zahvaljujem.

Predsjedavajući:

Zahvaljujem kolega Zahiragiću. Kolegica Šahman Bilsena.

Poslanik/zastupnik Bilsena Šahman:

Hvala predsjedavajući. Pozdravljam sve kolege, pozdravljam naše sugrađane. Ja neću poimenice hvaliti, sada ćemo da prekinemo ovaj niz da svako hvali svoga ministra. Ja moram reći da je u prošloj Vladi bilo jako dobrih ministara, da je u ovoj Vladi bilo dobrih ministara, većinom su dobili dobri ministri i saradivali su dobro. Bili su dobra ekipa. Ali da ne bi smo naše sugrađane dovodili u zabludu da oni misle kako neko nije dobro radio ili dobro radio da je ovo zapravo sve stvar politike i da su oni došli da naprave Vlade ispred politika koje ih kasnije nisu podržavale i da je zbog tih prepucavanja na višim nivoima došlo do pada ove Vlade. Tako da ja im se zahvaljujem što su u najteži period prošli sa nama. Nismo možda pomogli mi kao zastupnici koliko smo mogli i koliko smo trebali. Situacija je bila jako složena i teška. Premijer Mario Nenadić je zaista dao sve od sebe i da ovo nije njihov nerad ili loš rad nego stvar politika koje su razvalile ono što su napravile u martu. Zahvaljujem.

Predsjedavajući:

Zahvaljujem uvažena zastupnice. Evo da sačekamo da vidimo ima li još neko prijavljen. Ukoliko nema, ja zaključujem raspravu. Glasat ćemo za dvije odluke. Znači, prva odluka jeste Odluka o prihvatanju ostavke na dužnost premijera Kantona Sarajevo. A druga će biti Odluka o potvrđivanju razrješenja Vlade Kantona Sarajevo koju je predložila uvažena dopredsjedavajuća Danijela Kristić. Molim sekretara da napravi anketu. Znači za prihvatanje ostavke premijera Kantona Sarajevo. Anketa je otvorena. Molim zastupnike da glasaju. Otvaram glasanje. Zaključujem glasanje.

Za je glasalo 23 zastupnika, protiv niko, suzdržanih 9.

**KONSTATUJEM DA JE SKUPŠTINA PRIHVATILA OSTAVKU PREMIJERA VLADE KS.**

Molim sekretara da napravi anketu za Prijedlog odluke koju je predložila uvažena dopredsjedavajuća Kristić. A to je

**ODLUKA O POTVRĐIVANJU RAZRJEŠENJA VLADE KANTONA SARAJEVO**

## I

Razrješava se Vlada Kantona Sarajevo u sastavu:  
Mario Nenadić, premijer

1. Mersa Kustura, Ministarstvo pravde i uprave;
2. Faruk Kapidžić, Ministarstvo prostornog uređenja, građenja i zaštite okoliša;
3. Nihada Glamoč, Ministarstvo komunalne privrede i infrastrukture;
4. Adi Kalem, Ministarstvo saobraćaja;
5. Ismir Jusko, Ministarstvo unutrašnjih poslova;
6. Draško Jeličić, Ministarstvo privrede;
7. Jasmin Halebić, Ministarstvo finansija;
8. Rusmir Mesihović, Ministarstvo zdravstva;
9. Anis Krivić, Ministarstvo za obrazovanje, nauku i mlade;
10. Kenan Alikadić, Ministarstvo kulture i sporta;
11. Jasna Agić, Ministarstvo za rad, socijalnu politiku, raseljena lica i izbjeglice;
12. Hajrudin Grabovica, Ministarstvo za boračka pitanja.

## II

Premijer i Vlada u ostavci će obavljati sve poslove iz svoje nadležnosti u skladu sa ustavom i zakonom do dana potvrđivanja Vlade u novom sazivu.

## III

Ova odluka stupa na snagu danom donošenja i objavit će se u „Službenim novinama Kantona Sarajevo“.

Molim zastupnike da glasaju o Prijedlogu odluke o potvrđivanju razrješenja Vlade Kantona Sarajevo.

Zaključujem glasanje. Za je glasalo 22 zastupnika, protiv 1 i suzdržanih 10.

**KONSTATUJEM DA SMO POTVRDILI PRIJEDLOG ODLUKE O POTVRĐIVANJU RAZRJEŠENJA VLADE KANTONA SARAJEVO.**

Prelazimo na realizaciju tačke dva, a to je:

AD – 2.

**PRIJEDLOG ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJA I ADMINISTRATIVNA PITANJA SKUPŠTINE KANTONA SARAJEVO**

Materijal ste dobili u viber grupi. Molim predstavnika Predlagača da podnese uvodne napomene. To je uvažena dopredsjedavajuća Kristić ako ima potrebe. Kolegice Kristić izvolite.

Dopredsjedavajuća Danijela Kristić:

Zahvaljujem predsjedavajući. Pa ja ću samo kratko. Podnosimo Prijedlog odluke o izmjeni Odluke o imenovanju Komisije za izbor i imenovanja i administrativna pitanja. U prilogu akta smo dostavili Prijedlog odluke o izmjeni Odluke o imenovanju Komisije za izbor i imenovanja i administrativna pitanja Skupštine Kantona Sarajevo. I predlažemo da Skupština Kantona Sarajevo donese navedenu odluku. Hvala.

Predsjedavajući:

Zahvaljujemo uvažena dopredsjedavajuća Kristić. Da li predstavnici radnih tijela žele riječ? Ima li pitanja? Otvaram raspravu. Ukoliko se niko ne javlja za riječ, zaključujem raspravu.

**MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI ODLUKE O IMENOVANJU KOMISIJE ZA IZBOR I IMENOVANJA I ADMINISTRATIVNA PITANJA SKUPŠTINE KANTONA SARAJEVO.**

**A SEKRETARA DA NAPRAVI ANKETU, ZASTUPNIKE SVAKAKO DA GLASAJU U VIBER GRUPI. OTVARAM GLASANJE. ZAKLJUČUJEM GLASANJE.**

**ZA JE GLASALO 24 ZASTUPNIKA, PROTIV 6 I SUZDRŽANO 2.**

**KONSTATUJEM DA JE SKUPŠTINA DONIJELA OVU ODLUKU.**

I prelazimo na realizaciju tačke tri, a to je:

AD – 3.

**PRIJEDLOG ODLUKE O IZMJENI ODLUKE O POTVRĐIVANJU KANDIDATA ZA IZBOR PREDSEDAVAJUĆEG ILI ZAMJENIKA PREDSEDAVAJUĆEG SKUPŠTINE KANTONA SARAJEVO**

Molim predstavnika Predlagača da podnese uvodne napomene, predsjedavajuća Kluba Bošnjaka, zastupnica Amra Junuzović-Kaljić. Kolegice izvolite, imate riječ.

Poslanik/zastupnik Amra Junuzović-Kaljić:

Klub Bošnjaka Kantona Sarajevo na sjednici održanoj 24.11.2020. donio je sljedeću odluku:

I

Klub Bošnjaka predlaže Elvedina Okerića kao kandidata za mjesto predsjedavajućeg odnosno zamjenika predsjedavajućeg Skupštine Kantona Sarajevo umjesto dosadašnjeg kandidata Mirze Čelika.

II

Ova odluka zajedno sa Prijedlogom odluke o izmjeni odluke o potvrđivanju kandidata za izbor predsjedavajućeg i zamjenika predsjedavajućeg Skupštine Kantona Sarajevo dostavljena je Skupštini radi potvrđivanja.

Hvala lijepo.

Predsjedavajući:

Da li predstavnici radnih tijela žele riječ? Nije se niko javio. Ima li pitanja?nema. Otvaram raspravu. Ukoliko se niko ne javlja za riječ, zaključujem raspravu.

**MOLIM ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O IZMJENI ODLUKE O POTVRĐIVANJU KANDIDATA ZA IZBOR PREDSEDAVAJUĆEG ILI ZAMJENIKA PREDSEDAVAJUĆEG SKUPŠTINE KANTONA SARAJEVO.**

Otvaram glasanje.

Ujedno, koristim priliku da se zahvalim svim uposlenicima Kabineta predsjedavajućeg kao i Skupštine Kantona Sarajevo, premijeru i članovima Vlade i svim zastupnicima i zastupnicima koji su pomogli i doprinijeli da se sjednice organizuju online i da poštujemo i kako Ustav tako i Poslovnik i sve važeće zakone. Još jednom vas se svima pojedinačno zahvaljujem. Zaključujem glasanje.

**ZA JE GLASALO 32 ZASTUPNIKA, SUZDRŽANIH I PROTIV NIJE BILO.**

**KONSTATUJEM DA JE SKUPŠTINA DONIJELA OVU ODLUKU.**

Kolegi Okeriću čestitam u svoje lično ime i nadam se da će obnašati poziciju kako to dostoji kolegi Okeriću.

Obzirom da smo iscrpili sve tačke dnevnog reda a prijedlog predlagača dnevnog reda Konakovića je bio da nakon ove tačke prekinemo sjednicu. Ja konstatujem da je dnevni red 12. Hitne sjednice iscrpljen, zahvaljujem se svim prisutnim i zaključujem rad na sjednici. Hvala vam još jednom.